

**IZESU' EVENELE ZUHO  
TESALONIKA NUMUNO  
EBEKU' MINAVEMU' LUHUVO  
NITE' NABA 1 PAULO'  
GIZE-NGIDINE'  
IZESU' EVENELE ZUHO  
TESALONIKA NUMUNO  
EBEKU' MINANI' NETI  
LUHUVO NITE' 1 & 2  
Paulo' Tesalonika Eveneliti  
Luhuvo Nite' Gize-nGidine'  
Gomu' Gataa' Gamazi**

Tesalonika nene Makedonia misubou' numuno ebe' naba minine'. A'mine nene guvo noso avito' minavo misubo vaitati' nene sipi muki' a'mida iga' ani'. Tesalonika aleve nene ve naba'ine engi' gizebo i-ngidilizave ha di otaa' aha Loma veti guve'inesi ve naba ne'mo misubo'ine nene gizebo o minine'. Ne'mine ogavosa ingine nene Loma veti lou'nido' ha gili dalizado' o minine'. Tesalonika aleve nene Zuda ve minamani'. Gamazi nene nGiliki gamaziuti' laa' ani' ido' o'mosote ve li a'inedunu' lili' ani' initeti' e'meti gili ele'vole' iga' ani'. O'moso'mi lou' gamazi'velo' lisihe' amine' suno di ato ato' monovo daa' ani'. Ti' iga' ani'za Zuda ve ma nene a'mingu' igi ingi monaa' ani'. A'minete mono' numuno ma gizani'. Evene' muki' meme' ize zopovodunu' lavolavo lili' iga' ani'. Ti' iga' ani' nene ingine bisinisi'ine minine'.

O'moso'mo aposolo Paulo'ni nene Zuda ve minamani' heta ato' ve nene Izesu'nimu' lo-ngemelive lo imiseline'. Imiselavo ti' ogo lo-ngeme'mo mone mone o'mo vo Tesalonikala heteline'. Hetelo mine do vida nadi' ihe nemu' nene Aposolo laka'ni 17 ido' goholo 1 neloti' 19 neu' gato gelesane. Tesalonika aleve Izesu'nimu' lo ngeme' ngeme' ivo evene' lingelati' ma gili ele'vole' ani'. Olihe lo ngeme' ngeme' olosa neivo line' gamazi gili damave nene Izesu'ni e'metave nemu' ngizebolo' molani'. Ti' ogavo Paulo' Tesalonika ebe' hulo volosa ine'.

Tesalonika hulo numuno ebe' ngomo ma gulive Belia nela vine'. A'mida gamene ngomo ma mino Izesu' monovo'vemu' lo-ngeme' ngeme' ogo neivo Zuda ve Tesalonikala minani' nete gili gohi a'mida igi ganala di imani'. Ne'mine angumu' Paulo' aza Belia ebe' hulo numuno ebe' naba gohi ma Atena nela vine'. Paulo' nene Izesu' zuho Tesalonikala minani' nemu' Zuda vesi evene' masi Tesalonika minani' nete ngibili ngele'mizi goloso nahe lo agae lo gopo gala gelo minine'. A'mine Tesalonikala nadi' igi nizahe vo ningezo lo Paulo' Timoteo'ni imiseline'. Paulo' aza Atena numuno ebeku' nene ngomo ma mono' lo-ngemo mino gohi numuno ebe' naba ma minine' gulive Kolidi neu' vine'. A'mida neivo Timoteo' aza Tesalonika ebekukoti' tine' molo ani'. Ogo ti' lo line': Evene' nete Izesu' zuho nene ngibili ngelemi di goloso nii-ngidani'za Izesu' zuho ingine amuzo mili Izesu'nimu' gili ele'vole' igi nizave lo Paulo'ni lo-imine'. Ido' Paulo'nimu' li aza nene ha inite' nimilizave lo mono' gilave nene go'ine izo soza saza nolane li nilave lo lo-

imine'. Mono' gilave ma nene aka golosou' vaa' inite' nene ha nidave ido' monovo goloso palasa di nizave line'. Ido' Izesu' zuho ma nene hi-langumu' linge ma nene agae li mulumo gili-ngidi nizave. Izesu' tine' molaline' gamene a'mine hilani' zuho nene nadilizahe li gili minani'.

Paulo' a'mine gamazi gelo luhuvo nite' gizo Izesu' zuho Tesalonika ebeku' minani' ne hulo-ngidine'. A'mingu' ti' lo lo-ngimine': Lengi' nene Izesu'nimu' amuzo mili gili ele'vole' igi minani' nene lanite' giluve line'. Ido' Tesalonika ebekuko mino naline' initekumu' geheni gono dani' ma gililizave lo lo-ngimine'. Ido' evene' maloti' inite' haza ma damine' nesi lo-ngimine'. A'minemu' gililizani' nene Paulo'nimu' evenelite goloso palasa gamazi lani' nene gamazi gihile nomive li gililizave lo gelosa ido' gopo' napa' moni evene' ma ne di gopo i-ngidamilo lo nesi lo-ngimine'. O'moso'mi lulolavo' igi mili monilizave lo lo-ngimine'.

Ido' a'midoti' nene Izesu' zuho hilani' mamu' nene gopo ga'ine gilikelizave lo Izesu' aline' gameneu' inite' pata' soto' ogo nadilihe nemu' lo-ngimine'.

Paulo' a'mine luhuvo nene gizo hulavo gati gilani' nene Izesu' mo geto alinekumu' lihe li gili gono'ine dami ha mini evene' maliti numu'ninguti' noso nite' nika' nika' i minani'. Ti' igi minani' nemu' Paulo' gelo luhuvo nite' gohi ma gizo huline'. Ti' ogo Izesu' alosa iline' gamene noalitivo inite' ato ato' soto' iline' nemu' lo-ngimine'. Ido' gopo ga'ine gili Izesu' zuho lili' amani' nete ani' ne'mine amilizave ido' evene'

ma nene voku' voku' li nami angise'ine gono disa nalizave lo lo-ngimine'.

Mene gamazi nene gato ma nene luhuvo nite' sita' Paulo' Tesalonika alevetine gize-ngidine' ma nene gato gele guno ozo.

*Paulo' Aza Izesu' Evenele No'noho' Ize-ngedo Lo-ngimine' Gamazi*

<sup>1</sup> Paulo' nazasi ido' Siluvanokisi Timoteokisi laza Meteho O'moso ido' Guvetesi ve Izesu' Kilisito' eze evenele zuho lingine Tesalonika ebeku' mulise milaa' nani' nene luhuvo nite' gize-lengedelone losa luhuvo nite' mene nogize-lingiduze. Ningilo. Nogize-lengedo O'moso'mo nasahili o-lengedavo hongu lamineku' minilizave lo ezela noluve.

*Tesalonika Aleve Gili Ele'vole' Igi Mono' Akalo' Vani' Monovo'ine Nene Lamine' Ine' Gamazi*

<sup>2</sup> Laza lingine mukikumu' ve lo gamene gamene O'moso opo'ni lovo' lovo' oga' noune. Ido' gosele' lebelamivo lengikumukisi O'mosola lo minaa' noune.

<sup>3</sup> Ee, Meteho O'moso'mi velelo' mini lingine Izesu'nimu' gili ele'vole' iga' nani' ne'mi gi-hile've di soto' igi gono daa' nani' nemu' ido' lutine ngimi amuzo mili nasahili' i-ngidaa' nani' nemu' ido' Izesu' Kilisito' ogo do lu' izeleseive li gilingili igi mini lutine di gili' li hongu li minaa' nani' nemukisi gelo O'mosola laa' noune.

<sup>4</sup> Ido' neze zuhokizo, O'moso'mo lulo lengeme neine' mate, aza neni' ve lo do kegese-lingidine' nene gele nounako nemukisi opo'ni laa' noune.

<sup>5</sup> Mono' gamazi lamine' do vo lo-lingimune' nene haza gamazi lolo' amine' ve. O'moso'mi Sikalahu' amuzo'vesi neine' nene soto' ogavosa gele ele'vole' o mino lo-lingimune' nemu' O'moso'mo do kegese-lingidine' nene mo gele none. Ne'mine ogo laza lengikumu' ve lo lengita mono' gono do minune' gameneu' ogo molo ogo minune' monovo nene langisetine mo ningi gili nizave.

<sup>6</sup> Monovote ningi gili unidi'mine unidi'mine igi Guvetesi ve idi'minesi igi minani'. Ne'mine igi O'moso'mi gamazi gili gili ele'vole' igi gili di minikevo nemu' amuzo mili goboni mili-lingidi'mi vi minangukisi O'moso'mi Sikalahu' aza muludine do lamine' ogo neivo muludingu' lamine' gili minani'.

<sup>7</sup> Lingine ne'mine igi minani' nene gili Make-donia misubou' ido' Akaia misubou' mono' gili ele'vole' avete lingine adi'mine igi lenge'meti vani' ve.

<sup>8</sup> Ido' Guvetesi ve'mi gamazi nene lengitati' vo hutile' ogo Makedonia misuboukisi ido' Akaia misuboukisivo' vivoba numudo' namado' lingine O'mosomu' gili ele'vole' ani' ne'mi guvele nene buu lo vine'. Buu lo vavo evene' muki' gili osu' likeve. Nemu' ma lo-ngemelonido' nomive.

<sup>9</sup> Evene' angise'ine vetete' igi li soto' iga' nave. Laza lengita vo mino gono dunivo ne'mi gihile've soto' ine' nemu' vetete' igi lingine ve'ine ga'ine nomine' avazaha o'moso nite' gelekele' i-ngidaa' igi minani' nene mehedine ngimi O'mosola vi gi'mizi velesi neive O'moso gihile gelekele' i-di minaa' nani' ne'mi gamazi li soto' iga' nave.

<sup>10</sup> Ido' ne'mine igi lingine a'mine O'moso'mi gipele hilinguti' do ote-dine' nene Okulumokuti' alingumu' gizebo igi nizani' nemukisi vetete' igi laa' nave. Ado' a'mine alinge' gonito' voku-nivo O'moso'mo lihimete apaso mulumo nite' o-ledelesa neinguti' do lu' iza' neive Izesu'nimu' nene noluve.

## 2

### *Paulo' Tesalonika Ebeta Mono' Gono Dani' Gamazi*

<sup>1</sup> Neze zuho mate, lengita vo gono dunivo vo haza amine' nene langisetine ningi gili nizave.

<sup>2</sup> Ido' gomu' nene Hilipi ebeku' mulumo nite' i-lidi goboni mili-lidani' nesi langisetine ningi gili nizave. Ne'mine i-lidani'za leze O'mosote'mo hize ele' o-ledo amuzo lemavo a'mine mulu-mosi geni naba hiluningukisi O'moso'mi gamazi lamine' nene lovo' kiselevo' ogo lo soto' ogo lo-lingimune.

<sup>3</sup> Gatine do lo-lingimune' gamazi nene ladanga lo lo-lengemamune. Ido' goloso inite' daa' uni-vete lo-lengemamune. Ido' gotine izo soza lo lo-lengemamune.

<sup>4</sup> O'moso'mo leze luteu' ningavo eze gamazi lamine' nene ha li-ngimilizado' neive lo ningelede neivo lo-lengemaa' noune. Evenelite gili-likevo lamine' ilive losa nomive. O'moso luteu' ningaa' ive'mo ningivo lamine' ilive losa lo-lengemaa' noune.

<sup>5</sup> Lingine leze monovote gili nizave. Lengita minune' gameneu' monovote do haleko suno' mino

lengi' moni henenimu' mumuzo' ogo muludingu' hizo ma lamune. O'moso'mo gele neivo nolune.

6 Lengi' nehe evene' atolite nehe lezemu' gi-likevo dizavo guvetesi ve lolo' olone losa lamune.

7 Laza evene' naba gidini eze aposolo lili' igi minilizave lo Kilisito' aza lele'mize molanako laza amuzo molo-lengedelone' ha neive. Ha neine'za ne'mine amo ize'nibo mali'mo izipahala zou lo gizebo o-ngedo minaa' neine' ne'mino laza linginela minune' ve.

8 Ne'mine ogo lute lengita minavo O'moso'mi gamazi lamine' nene lo-lengemelone losavo' lamune. Lingine vodelo' aleve lili' ani' nemu' nene leze minevo' alevote lengita osu' liline' nene lamine' ve lo gelo nesi lengemelone losa lune.

9 Neze zuho mate, ele'vole' gono do labusote ilivo gono do minune' nene mo gili nizave. Linginelati' inite' ma limilizani' nene linginela nomivo geni ogalive lo holisekisi holukakisi okode losuvo'mi gono ele'vole' ogo do mino O'moso'mi gamazi lamine' nene lo-lingimune' ma neive.

10 Laza lute laminekisi mine kegeše mino lute lisihekisi mino lihimete nomivo mino mono' gila' ave lengita ogo molo une' nene mo linginesi O'mososi ningi gili nizave.

11 Me'nibo mali'mo izipahala zuho o-ngedaa' neine' ne'mine ogo laza lingine hamo hamo' ne'mine o-lengedo minaa' une' ma ve.

12 Ne'mine ogo gatine do vodine lutine do gilingili o-lengedo lo huko ti' lo lo-lengemo minune: Ei' gizebo o neingu' mini eze labana've ningi di ti' ilizave lo O'moso'mo lengele'mize molaze.

Nemu' O'moso ei' evenele zuho igi mili ilizani' o nolidokovo' igi mili minilo lo lo-lengemo minune' ma neive.

<sup>13</sup> Ido' laza O'moso'mi gamazi lo-lingimunivo gilikevo haza eveneliti gamazi lolo' amine' ve. Lingingine O'moso'mi gamazi ve li gili di go'zani' ma neive. Mo lamine' O'moso'mi gamazi neive. O'moso'mi gamazi ne'mo mono' gili gili ele'vole' i nizave lengita gono daa' neive. Nemu' nene laza gamene gamene gosele' lebelamivo O'moso opo'ni laa' noune.

<sup>14</sup> Neze zuho mate, O'moso'mi evenele zuho Zudaia misubouko Izesu' Kilisitoda vi gi'mizave inginesi linginesi hamo' suno di nizavo mulumo inite' i-lingidi engi' nene Zuda vete goboni mala' mala' i-ngidani'. A'mine'mine igi lingi zuho malitesi goboni mili-lingidani' ve.

<sup>15</sup> Zuda ve ingine neve gozopo' O'moso'mi gamazi li soto' iga' ave polohete nene ngibili hilani'. Ido' a'mine'mine igi Guvelesi ve Izesu'ni nesi bili hilani' ve. Ido' leze libili ga' limiselani'. A'mine Zuda vemu' O'moso'mo gilivo lamine' amine'. A'mine Zuda ve nete evene' muki' numudo' namado' ve nene lovo i ngimi minaa' nave.

<sup>16</sup> Laza ato ato' vetida vo mono' lo-ngemekunivo gili O'moso'mo do ngu' izivo minilizave lo volosa nonivo a'mine Zuda ve ingine ne'mine igi lelikumu' nene mono' goloso laa' nanako aka hize tilelobe li lovo gani li-limaa' ani'. Ingingine ne'mine ivi' ivi' igi minikevo engi' lihime eheto' eheto' ogo dize minavo O'moso'mo izebolo' molani' ne'mi lovo've nene engita mo ogo minave.



*Paulo' Tesalonika Ebeta Gohi Volove Lo Gala Giline' Gamazi*

<sup>17</sup> Neze zuho mate, leli' nene gamene ngomo hulo hoto' o-lengedo sihele'ni izipe ne'mine lolo' ogo none'za hulo hoto' o-lingidune' nene lute-dunu' nomive. Okode losuvodunukovo' ne'mine une. Nemu' nene lengikumu' lisivo mino lingi vo ningelone lo amuzo molo gelo aka vise' ogo minune.

<sup>18</sup> Lengita volone lo gelo minune' nenako Paulo' naza gamene masi masi volosa okuvo Satani'mo aka hize tile-nidine'.

<sup>19</sup> Lengikumu' ve lo lanite' gelaa' noune. Nene ne'mino neive: Guvetesi ve Izesu' heteleline' gameneu' nene zaa' vete leli' gonoli'mi gihile lili' ilizave. Langise nene leli' gonoli'mi gihile lili' ilisave. Nemu' lengikumu' lolize izo minaa' noune.

<sup>20</sup> Lengikumu' muludeu' lamine' gelo O'moso opo'ni laa' none.

### 3

<sup>1</sup> Lengikumu' nisivo mulumo gelo minuvoni' nene edamivo Timoteo' aza hulo-nedo lengita vavo nenikovo' Atena numuda minelove lo gelo

<sup>2-3</sup> Ilekisi maka' O'moso'mi gono do Kilisito' gamazi've lamine' lo soto' oga' ive leze zuho Timoteo'ni imiselekuve. Ido' imiseluvoni' nene aza lengita vo monokumu' lengi' goboni mili-lingidi nizani' ne'mo nene mono' hulikelizave lo gatine do lutine do ngi lo-lengedo Izesu'nimu' gili ele'vole' nani' nene do amuzo molo-lengedelive lo imiseluvoni' ve. Ee, O'moso'mo gelavo a'mine

geni nene ha gehelonido' o none' nene lingine mo gili nizave.

<sup>4</sup> Ee, a'mine geni olihe soto' amivo laza lengita ha minune' gameneu' nene mulumo geni nite' soto' o-ledelesa neive lo gomu' ogo lo-lingimune' nenako nemu' nene a'minemu' mo ningi gili nizave.

<sup>5</sup> Ido' lemengu' molaa' ive lengemengu' molavo lengita gono dune' nene vo haza ogalinako mono' gili di nizahe ido' hulahe lo ne'mi monovo gelelove lo lengikumu' mulumo naba gelosa ogo molo minuvonikisi edamivo Timoteo'ni imiselekuvo vine' ve.

<sup>6</sup> Ido' Timoteo' aza lingisi minadati' lezela ogo hetelo lingine Izesu'nimu' gili ele'vole' igi minani' nemu' vetete' ogo lo-lemave. Ido' lelikumu' gilikevo gamene gamene lamine' ogo minaa' ivo laza lingine ningelone lo minaa' une' ne'mino linginesi a'mine'mine igi lezemu' ningelone li gili minaa' ani' nesi lo-leme osu' lave.

<sup>7</sup> Lo-leme osu' lavo neze zuho, lingine Izesu'nimu' gili ele'vole' igi minani' nene gelo nemu' lengikumu' geni libiline' nene mateledavo goboni mili-lidi nizavo mulumo gelo noningukisi lamine' gilune' ve.

<sup>8</sup> Idi'nise lingine Guvetesi vela vi gi'mizi ele'vole' i nilizani' nemu' gelo luteu' lamine' ogavo gohi mine lamine' ogo ogo molo minelesune.

<sup>9</sup> Ido' lengikumu' ve lo O'moso'mi velelo' muludeu' lamine' goloso giluningumu' ve lo lengikumu' do dizosa O'moso opo'ni lolone.

<sup>10</sup> Gele lemavo lengita vo ge ninge ne ninge lo mono' linge ma mine'mo vo neine' nene imine'

molo lo-lengemelone lo holisekisi holukakisi vauve elo O'mosola laa' noune.

<sup>11</sup> Ido' Meteho O'moso asi'vesi Guvetesi ve Izesukisi volone' akate velo hulo lengita ivo.

<sup>12</sup> Guvetesi ve lengita gono davo lengiku' lutine ge neme ne geme li mini la'lise leli' lute linginela mulune' ne'mini linginesi a'mine'mine igi lutine evene' mukita milikevo buu lo a'mine monovo amuzo molo minelive lo O'mosola nolune.

<sup>13</sup> Ne'mine ogo Guvetesi ve'mo lutine do ngi lo-lengedavo Guvetesi ve Izesu' eze evenele zuho mukikisi ogo heteleline' gameneu' lingine nene O'moso'mo ningivo lihimetine nomivo lutine laminekisi minilizave.

## 4

### *Mino Molo Nonivo O'moso'mo Gilivo Lamine' Iline' Gamazi*

<sup>1</sup> Neze zuho mate, gamazi mo gize lengemeku-voni'za ma neine' nene lo-lengemeloze. Gililo. Guvetesi ve Izesu' ei' velemu' ogo gatine do amuzo molo lo-lengedo lingine monoku' igi mili minilizani' ne'mo O'moso'mo gilivo lamine' iline' ne'mi monovo apize lingimune' ne'minevo' igi minilo lo nolo-lingimune. Ne'mine igi nizani'za gohi amuzo mili minilo lo nolo-lingidune.

<sup>2</sup> Lingine gili dalizani' gamazi Guvetesi ve Izesu' velemu' ogo gozopo' lo-lingimune' nene mo gili nizave.

<sup>3</sup> O'moso'mo ne'mine igi minilizave lo gelo ti' lo laa' neive: Vene' vemoho' gopo' napa' monaa' nene huli evene' kekeize ve, ve lisihe' lamine' minilizave lo laa' neive.

4 Lingine hamo hamo' okodine di kekeize li mini evene' ve'nido' lihimetine nomivo minilizave.

5 Evene' ato' ato' O'mosomu' gilamavete vene' alumu' ngumo helepele' ivo a'minemukovo' gili di monaa' nave. Lingine ingine iga' adi'mine amilo.

6 Mali'mo ne'mine iline' nene ve gonoloho noso molani' nene avuto' ogo elenahine longo' ogo a'mine ve gonolohi inite've do gopo o-dalive. Ne'mine ilizave nene Guvelesi ve'mo lihime ngemeleseive lo gomu' ogo lo-lingimune' ma ve.

7 O'moso'mo lengele'mize molani' nene vene' vemoho' gopo' napa' monanguti' lutine nene goloduvosi minilingumu' ve livoba lutine nene guluvi' lamine' lisihe' minilingumu' ve lo lengele'mize molani' ve.

8 Nemu' nene a'mine gamazi gele hulilive ne'mo haza eveneliti gamazi gele huluhe lo O'moso'mi gamazi gele huloloseive. Ido' gamazi've gele hulilingu' nene aza O'moso nesi vasa ize-deleseive. Ee, eze Sikalahu've lamine' lengemaa' ive O'moso nene vasa' ize-deleseive.

9 Lutinedunu' nasahili' ge o-nede ne o-gede li minilizave lo O'moso'mo asi've monovo've lengelebizo lo lengeme neine' nenako laza luhuvo nite' gize lengemo lingine Izesu' evenele zuho linge nene lutine ngimilizave lo nanitekumu' lo-lengemelone.

10 Ido' lo-lengeme neine' ne'mine igi lingine Makedonia misubou' Izesu' evenele zuho mini'mi moni nizave muki' nene lutinedunu' nasahili' i-ngidi minaa' nave. Ne'mine igi nizani'za gohi amuzo mili li-ngimi minilo lo

gatine do nolo-lingimune.

<sup>11</sup> Ne'mine ogo gamazi ti' lo lo huko lo-lingimune': Zou lo mino evene' maliti gamazilo' nehe noso' niteto' nehe gopo domo dize dize ogo monamo leli' initetemukovo' gelo mino la'lisete adedunu' gono do minelone li ne'mine ilisavo' amuzo milalo.

<sup>12</sup> Ne'mine ikevo nemu' evene' mono' gil-amavete gilikevo monovotine lamine' mineleseive. Ido' ne'mini gono dalizadi'mo inite' mata-tine vai' lo minavo evene' mala initekumu' voku' voku' ma lilizado' o minamoloseive.

### *Guvesi Ve Tine' Molo Ogo Do Ote-ledeline' Gamazi*

<sup>13</sup> Neze zuho mate, gililo. Mono' gilamavete ingine hilavemu' gopo ga'ine gili mo hili osu' likeve li gohi ningamolosune li ive nama iga' nave. Inginge ne'mine iga' nani'za linginesi ne'mine ike-lizave lo hilavemu' nene lo-lengemelouze. Gililo.

<sup>14</sup> Laza nene Izesu' hilinguti' gohi otine' nene gele ele'vole' o none. Nemu' ti' lo gelelone: Tine' molo aline' gameneu' nene Izesu'nimu' gili ele'vole' igi hilave inginesi O'moso'mo ngele'mizo aloseive.

<sup>15</sup> Guvetesi line' gamazi ma lo-lengemelesune: Misubouko vetesi nonive nete Guvetesi ve aline' gameneu' nene hilave ngivile' amolosune.

<sup>16</sup> Guvetesi ve Okulumokuti' lemelve lo amuzo molo vise lavo angeloliti guvel'inesi ve naba ne'mo nolo molavo O'moso'mi pikuli've ne'mo nolo molavo lemeleseive. Nolimivo Kilisito'nimu' gili ele'vole' igi minadoti' hilave ingine gomu' mili otillisave.

17 Otikeyo evenele zuho lingela laza vetesi minelonive nene O'moso'mo lele'mizo dizavo a'mido' imine' molokunivo limuso avilelo' Guvelesi vesi maka' do bizelesune. Ne'mine ogo Guvetesi vesi minevo' minevo' ogo minelesune.

18 Nemu' nene lingine gamazi mene li volelo' melo' igi gili hilavemu' mulumo gili ma ge do hongu lo-nede ne do hongu lo-gede li minilo.

## 5

### *Guvetesi ve Alingumu' Gizebo Ogo Minelone' Gamazi*

1 Neze zuho mate, gamene nanike' ogo vavosa Guvetesi ve alive ido' nanite' nanite' soto' ogavosa alive. Ne'mine initekumu' nene nanitekumu' luhuvo nite' gize lengemelone.

2 Langisetine gili nizave. Guminelo' ve holuka' alizave lo gelamune' gamenelo' igi hetelaa' adi'mino Guvetesi vesi a'mine'mine ogo aloseive lo gelamolone' gamenelo' ogo heteleleseive.

3 A'mine gamenelo' evene' ingine gamene lamine' initeli'mo lebelamiline' gamene neive li nizavo ngemengingi initeli'mo lite' lo ogo mudise do goloso o-ngedeleseive. Iziye gatu'inesi vene' ingine mulumo gililiza gamene gilami gopo ni-monavo mulumo inginela soto' ogavo nini' iga' nani' ne'mine ogo a'mine ngemengingi inite' nene soto' o-ngemeleseive. Soto' o-ngemavo nene ngeli golise vilizahe.

4 Neze zuho mate, lingine nene initekumu' ma gilami liti'musou' ma minamave. Nemu' nene guminelo' vemu' evene' ingine gizebo igi minamilizani' gamenelo' igi hetelaa' ani' ne'mino

linginesi a'mine gamenemu' gizebo igi minamado' ogo do upuho' o-lengedalive.

<sup>5</sup> Lingine muki' labanali'mi zuho nizave. Liti'muso'mi zuho nomune.

<sup>6</sup> Nemu' evene' lingela haza ve ingine lu'ine okise ongo minaa' ine' ne'mino lute ongamivo lute gate gopo amivo la'lisete gizebo ele'vole' ogo minukele'zo.

<sup>7</sup> Inginge okise ingaa' nave nene liti'musou' ingaa' nave. Ido' noso nii sipaki iga' nave inginesi nene liti'musou' nii sipaki iga' nave.

<sup>8</sup> Labana' gamene'mi evenele nounako sipaki amo lute gate do veveso minelone. Ne'mine ogo Izesu'nimu' gele ele'vole' o none' ido' lute ngemaa' nounce' ne'mo lepesete lolo' ogavo O'moso'mo do lu' izavo lamine' minelone lo lute gilingili ogo minaa' neine' ne'mo leze lovo angili' ne'mine lolo' ogavo minelone.

<sup>9</sup> Ne'mi monovo ne'mino neive: O'moso'mo izebolo' molani' nene apase-ledo lihime lemelve lo lele'mize molani' nomive. Asi Guvetesi ve Izesu' Kilisito' do lu' izavo minelone lo lele'mize molani' ma neive.

<sup>10</sup> Hele noosa nehe vetesi minosa nehe ogavo ezesi minevo' minevo' ogo minelone lo Guvetesi ve lelikumu' ogo hiline'.

<sup>11</sup> Nemu' nene lutinedunu' ge hize ele' o-nede ne hize ele' o-gede li lutine di amuzo mili mini monoku' ge do amuzo molo-nede ne do amuzo molo-gede li idise iga' nani' ne'mine i diivo' vi minilizave.

*Ga'ine Do Geke' Lo-ngidine' Gamazi*

<sup>12</sup> Neze zuho mate, inite' mamu' amuzo molo nolo-lingidune: Guvetesi ve'mo ngele'mize

molavo lengita mono' gono di gizebo i-lingidi mini lengele'mizi hehe li nizavemu' nene gili lamine' igi minilo.

<sup>13</sup> Mono' gono daa' nanako engikumu' gilikevo amuzo molo dizavo mini lutine ngimi nasahili' i-ngidi minilo. Ido' lengi' okodingu' lovo lolize hizami hongu li minilo.

<sup>14</sup> Ido' neze zuho mate, gatine do ti' lo nolo-lingidune: Izesu' evenele malite oko'ine losuvo'mi gono dami gopo minaa' nani' nene di hehe li-ngidilo. Ido' golise gelekele' igi nizave nene di amuzo mili-ngidilo. Ido' Izesu' evenele maliti lu'ine nene ele'vole' amivo ma nene hize ele' i-ngidilo. Ne'mine igi evene' mukikumu' elese' igi hongu li minilo.

<sup>15</sup> Evene' mali'mo lengi' muludine do goloso o-lengedavo ma lingine gohi eze o-lididi'mine ve li eze muluno di goloso i-damilo. Ne'mine ike-lizaze. Lutine gizebo lamine' igi gamene gamene linginesi evene' mukikisi do lamine' o-ngedelone li a'mine monovolokovo' eleti igi mili minilo.

<sup>16</sup> Muludingu' gulumo avile lisivovo' minilo.

<sup>17</sup> Gosele' lengebelamivo O'moso opo'ni livo' minilo.

<sup>18</sup> Ne'mine mana'mine initekumu' O'moso opo'ni livo' minilo. Izesu' Kilisito' evenele zuho nizangumu' nene O'moso'mo ne'mine igi minilizave lo gele neive.

<sup>19</sup> O'moso'mi Sikalahu' nene izi huki-damilo.

<sup>20</sup> Ne'mine ami O'moso'mi veleti' gamazi li-lingimilizani' nene gilikevo haza nite' amivo.

<sup>21</sup> Gamazi muki' nene lamine' nehe goloso nehe lii ize' mili gili minilo. Lamine' neivo ma gili di



minilizave.

<sup>22</sup> Ido' goloso nite' ato' atoli'mine muki' nene hulilizave.

<sup>23</sup> O'moso aza hongu meleho asi've lutine do lamine' gehepeve o-lengedo gizebo o-lengedavo vodinesi lengemenisi okodinesi lisihe' ogo lamine' minavo Guvetesi ve Izesu' Kilisito' aline' gameneu' nene lihimetine nomine' minilizaho.

<sup>24</sup> Elese molo lingimive ne'mo lo huko line' gamazi've'mi gihile do soto' molalingumu' nene idise a'mene luvoni' gamazi ne'mi gihile nene do soto' molaloseive.

<sup>25</sup> Neze zuho mate, lelikumu' ve li O'mosola li minilo.

<sup>26</sup> Izesu' evenele muki' nene monoku' a'mine o neine' monovolo' e'meti a'nido' di ngabuti' izaa' monovo ne igi mili minilo.

<sup>27</sup> Naza Guvetesi ve'mi velemu' ogo amuzo molo ti' lo nolo-lingiduve: Izesu' evenele zuho muki' gili osu' lilizangisi luhuvo nite' mene gati ngimilo.

<sup>28</sup> Guvetesi ve Izesu' Kilisito' ei' nasahili've linginela minelive lo O'mosola noluve. Moda ve.

**MONO' GODOLO GOSOHO'**  
**The New Testament in the Dano (Upper Asaro)**  
**language of Papua New Guinea**  
**Nupela Testamen long tokples Dano (Upper Asaro)**  
**long Niugini**

copyright © 1989 Wycliffe Bible Translators, Inc.

Language: Dano

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-06-24

---

PDF generated using Haiola and XeLaTeX on 18 Apr 2025 from source files dated 31 Aug 2023

76c78bc1-63e6-5f61-a363-169051cfe72e